

समे – 12:25 hrs.

<><><><><><>

PM-MKB

प्रधानमंत्री नरेंद्र मोदी होरें अज्ज आकाशवाणी पर प्रसारित अपने “मन की बात” कार्यक्रम च जम्मू-कश्मीर दे अनौखे रामबन सुलाई मखीरै गी उजागर कीता। जंगली फुल्लें थमां उत्पादत इस खास मखीरै गी किश बरें पैहले गै जी.आई टैग हासल होआ ऐ ते बल्लें-बल्लें इसी पूरे देश च पंछान हासल होआ करदी ऐ। प्रधानमंत्री होरें आखेआ जे भारत अज्ज मखीर उत्पादन दे क्षेत्र च नमियां मुआंदरा हासल करा’रदा ऐ ते रामबन दे सुलाई मखीरै जनेह उत्पाद गै भारत दी समृद्ध मकामी विरासत ते बड़ी मती आर्थिक समर्थ गी दर्शाने दा कम्म करा’रदे न। प्रधानमंत्री नरेंद्र मोदी होरें अपने “मन की बात” कार्यक्रम च वोकल फॉर लोकल पहलकदमी दे महत्व पर बी जोर पाया ते आखेआ जे जी-20 शिखर सम्मेलन दुरान दुनिया दे लीडरें गी दिते गेदे तोहफे बी इस भावना गी दर्शादे न। उनें इस गल्लै पर खुशी प्रगट कीती जे मुल्खै च लक्खां बद्दे लोकें अपने रोजमर्रा दे जीवन च वोकल फॉर लोक दी भावना गी अपनाया ऐ। प्रधानमंत्री होरें आखेआ जे भारत च स्याले आहले सैलसफा लेई हर चाल्ली दी समर्थ ऐ, एहदे च पहाड़ें, संस्कृति ते रोमांच दे अनगिनत मौके बी मौजूद न। उनें दस्सेआ जे उत्तराखंड च स्यालू आला सैलसफा मते सारे सैलानिएं गी आकर्षित करा’रदा ऐ ते स्याले दे मौसम दुरान औलल, मनुस्यारी, चोपता ते देयारा जनेहियां थाहां लोकप्रिय होआ’रदियां न। प्रधानमंत्री होरें मन की बात नवंबर म्हीने च भारत दी काबले जिक्र खेड़ उपलब्धिएं दा बी जिक्र कीता। उनें

दस्सेआ जे इस म्हीने दी शुरूआत भारती महिला टीम नै आई.सी.सी महिला विश्व कप जितने कन्नै कीती ते भारती महिला खडारिएं कबड्डी विश्व कप जितियै इतिहास रची दिता। इन्ना गै नेई देसै दे खडारियें विश्व मुक्केबाजी कप फाइनल च शानदार प्रदर्शन करदे होई तगमे जिते। एहदे अलावा महिला टीम नै बिजन इक मैच हारे ब्लाइंड क्रिकेट विश्व कप जिती लैता। प्रधानमंत्री होरें आखेआ जे एह जित भारती खेड्ठें दे इतिहास च बड्डी जित न ते एह हर इक भारती गी प्रेरित करदी रौहग। अज्ज आहले अपने मन की बात कार्यक्रम च मोदी होरें इसरो आसेआ आयोजित अनौखी ड्रोन प्रतियोगिता दा बी जिक्र कीता जेदे च मुखै दे नौजोआनें मंगल ग्रह आंडर गै हालात च ड्रोन डुआने दी कोशिश कीती ही। उनें आखेआ जे हर बारी जिसलै ओह नौजवानें दा समर्पण ते वैज्ञानिकें दी प्रतिबद्धता गी दिखदे न तां उंदा दिल उत्साह कन्नै भरोची जंदा ऐ। प्रधानमंत्री होरें आखेआ जे नौजोआनें दा एह समर्पण विकसित भारत दी सभनें शा बड्डी ताकतें चा इक ऐ।

<><><><><><>

LG-Udhampur

उपराज्यपाल मनोज सिन्हा होरें कल उधमपुर च इस बरे अगस्त म्हीने कुदरती आपदा करी घरे गी पुज्जे दे नुकसान दे मददेनजर 341 घरे दे परतिए निर्माण लेई नीह पत्थर रक्खेआ। इस परियोजना पर 34 करोड़ रपे दी लागत औग ते एहदी अमलावरी एच.आर.डी.एस-इंडिया दे सहयोग कन्नै कीती जा'रदी ऐ। संगठन प्रति आभार जतांदे होई उपराज्यपाल होरें आखेआ जे इस जत्न कनै हाडें करी प्रभावित परौआरें गी परतिए बहाल करने च मदद थ्होग। उनें आखेआ

जे 2019 मगरा सरकार नमी उर्जा कन्नै कम्म करा करदी ऐ तां जे केंद्र शासित प्रदेश दा विकास होई सकै, लोकें दिएं आसैं-तांगें गी पूरा कीता जाई सकै।

<><><><><><>

BSF-Alert

मौसम च आए दे बदलाव ते बड्डलै सबेला पौने आहली धुंध करी जम्मू दे अंतरराष्ट्री बन्ने पर दूरै तगर साफ दिक्खने च किश परेशानी हुं'दी ऐ। एहदे चलदे सीमा सुरक्षा बल नै चौकसी गी होर निग्गर बनाया ऐ। स्यालै आहली रूतै दरान गश्त होर बी चुनौतीपूर्ण हुं'दी ऐ। बी.एस.एफ कर्मिं, जिंदे च महिलांकर्मी बी शामिल न, नै निगरानी गी होर व्यापक बनाया ऐ तां जे घुसपैठ दी कुसै बी भैड़ी कोशिश गी नाकाम बनाया जाई सकै। अधिकारिं दस्सेआ ऐ जे निगरानी आहली बाद्दू उपकरण लाए गए न ते गश्त बी बदाई गेई ऐ। बीएसएफ पूरी चाल्ली सौहगी ते सतर्क ऐ। उनें मुख्यक दी सुरक्षा च बीएसएफ दी पैहली पंक्ति आहली भूमिका गी फही दोहराया।

<><><><><><>

BSF-Youth Felicitation

सीमा सुरक्षा बल-बीएसएफ जम्मू नै पठानकोट थमां पुंछ तगर दे सरहदी इलाके दे उनें नौजोआनें गी कल सम्मानित कीता जिनें हाल च गै होई दी पहली जम्मू बीएसएफ मैराथन च जबरदस्त जोश जज्बा दस्सदे होई शानदार प्रदर्शन कीता। इस कार्यक्रम च सरहद लागे रौहने आहले नौजोआनें प्रतिभागिये दी दलेरी, पक्के धेड़यै ते जिस्मानी दमागी फिटनेस दा जश्न

मनाया गेआ। बीएसएफ अधिकारियें उंदे बेहतरीन प्रदर्शन दी तरीफ करदे होई आखेआ जे उंदा समर्पण समूलचे सरहदी इलाके लेई मान दी गल्ल ऐ। बल नै इनें नौजोआनें गी समर्थन देने दी अपनी बचनबद्धता गी दोहराया ते उ'नेंगी खेड्डें ते होर दुए रचनात्मक कम्में च बेहतरीन प्रदर्शन करियें नमियां उंचाइयां छूने लेई प्रोत्साहित कीता जेदे कन्नै जम्मू ते सरहदी इलाकें दे होरनें लोके गी प्रेरिणा थहोग।

<><><><><><>

Prog. Announcement

आकाशवाणी दा क्षेत्रीय समाचार एकांश जम्मू कल पैहली दिसंबर गी एड्स दी रोकथाम सरबंधी कुल संसारी ध्याड़े दे मौके पर 25एं मिन्टें दी इक विशेष चर्चा प्रसारित करने जा'रदा ऐ जेहदा विशे ऐ 'जागरूकता गै सुरक्षा ऐ: एच.आई.वी गी जानो ते एड्स गी रोको। एह कार्यक्रम सोमवारें कल पैहली दिसंबर गी दिनें 12 बजे प्रसारित कीता जाहग। इस विशेष प्रसारण च साढ़े परौहने होडन जम्मू-कश्मीर एड्स कंट्रोल सोसायटी दे आई.ई.सी डिविजन दे असिस्टेंट डायरेक्तर रिशीष खजुरिया होर जेहड़े इस विशे पर अपने माहिराना विचार श्रोताएं कन्नै सांझे करडन। कार्यक्रम दी मेजबानी साढ़े एंकर जगमोहन शर्मा होर करडन। एह कार्यक्रम तुस इस्सै चैनल पर मीडियम वेव 303 मीटर यानि 990 किलोहर्टज ते एफ.एम 100 अशारिया 3 मैगाहर्टज पर प्रसारत कीता जाहग।

<><><><><><>